

Concierto Dominical pa sostene hoben talento musical

ORANJESTAD – Fundacion pa Talento Musical “Donny Laclé” a presenta un biaha mas su Concierto Dominical den su Café Musical na Biblioteca Nacional na Oranjestad.

Esaki ta informacion for di un relato di e fundacion:

Manera semper e concierto ta tuma luga di 11or di mainta te 1or di merdia y entrada ta gratis

Invitacion pa e mainta aki a menciona tres grupo:

Duo Oro Aruba, e pianista Igmarr Maduro, compaña pa tres amigo y Rondalla Universo di Aruba. Nos talentonan musical a presenta un programa hopi varia cu a crea un ambiente dushi y relajante.

E prome duo cu a presenta ta consisti di Reynaldo, Rey, Lampe y Fortunato, Catei, Werleman. Dos integrante di Trio Los Arubeños, cu por cierto na januari di e aña aki a cumpli 50 aña di existencia. Y awo e trio bira duo, Duo Oro Aruba y cu e mesun dedicacion y entusiasmo a y lo aporta na carga e cultura musical di Aruba. Riba nan guitarra nan a toca y alabes canta pa nos : Toch mi sa, Atardi, Rayito de luna, Ora solo baha y algun mas.

Igmarr Maduro, kende na luna di april a duna nos un presentacion y splicacion di su Caha di Orgel y ademas a toca algun piesa riba piano, a bisa mi cu e ta desea di presenta un biaha mas riba piano so den nos programa Igmarr, di 23 aña, for di chikito a siña toca wiri y caha di orgel y na FDEC a siña toca cuarta y guitarra clasico, Igmarr riba su mes a siña toca piano, e ta loke nos ta yama un autodidactico. Pues Igmarr riba piano, compaña pa Tommy Figaroa, Ricky Figaroa y Bito Frankena pone un tremendo ambiente den Café Musical, y a pone diferente baliado subi pista, cu nan variacion di wals, tumba, danza y mazurka manera: Aura, Orijunchi, Erani y otro.

E concierto a termina cu actuacion di Rondalla Universo di Aruba bao direccion di Frank



Duo Oro Aruba

H. Croes musicalmente y pa harmonia di bos. Rondalla Universo di Aruba, diesun guitarista profesional tocando y cantando, no solamente a demostra un gran dominio riba nan guitarra, pero a presenta tambe un variacion grandi di cantica. Pa menciona algun: Mi'n sa di con, Mosa Bunita, Florecilla de amor, Sin bo mi ta perdi y Haragan Golos cu a pone esnan presente lanta los e pianan.

Mescos cu tur luna, a pasa rond cu e Caha di Glas den cua tur esnan presente a haci un donacion. Fundacion Donny Laclé pa Hoben Talento Musical ta maneha e donacionnan.

Ultimo concierto di aña

Otro luna, dia 27 di november, ta tuma luga e ultimo concierto pa e aña aki. E ora lo entrega na diferente hoben talento musical un yudansa financiero den nomber di tur esnan cu a haci un donacion durante aña 2016 den e caha di glas.

Luna pasa den e grupo di Carlos Bislip a toca diferente hoben cu ta disfrutando di e donacion aki for di aña pasa. Bon mira: te hasta nos mes ta disfruta un tiki di nos mes donacion. □